

ESTATUTOS DA DELEGACIÓN DE ALUMNADO DA FACULTADE DE FILOLOXÍA E TRADUCIÓN DA UNIVERSIDADE DE VIGO

TÍTULO PRIMEIRO: DOS FINS

Artigo 1.- NATUREZA

1. A delegación de alumnado da Facultade de Filoloxía e Tradución é un órgano colexiado dos representantes estudantís, expresión da vontade libre e democrática do estudantado da Universidade.
2. É o órgano encargado da coordinación das iniciativas encamiñadas á defensa dos dereitos dos alumnado da Facultade, sen ningún tipo de discriminación.
3. Cooperará co resto dos membros da Comunidade Universitaria na consecución dos fins da Universidade.
4. Promoverá e impulsará todo tipo de actividades que impliquen unha mellora e unha ampliación na formación humanística, científica e cultural do estudantado, así como a participación do alumnado na xestión universitaria.

Artigo 2. – FINS

Son fins da Delegación de Alumnado:

1. Representar todo o alumnado da Facultade de Filoloxía e Tradución.
2. Recadar e facilitar información sobre calquera cuestión académica ou universitaria de interese ao estudantado que o solicite.
3. Realizar calquera proxecto que resulte interesante para o estudantado da Facultade de Filoloxía e Tradución, sempre que este sexa aprobado pola propia Delegación.
4. Cooperar e coordinarse coa representación estudantil de distintos centros.
5. Programar e executar plans de actividades.
6. Promover a normalización e dinamización da lingua galega.
7. Tratar de solucionar todas as irregularidades que cheguen ao seu coñecemento nos ámbitos en que transcorre a súa actuación mediante o establecemento dun horario de atención ao alumnado presencial (aprobado en cada cuadrimestre pola Asemblea) e unha conta de correo electrónico.

TÍTULO SEGUNDO: DOS MEMBROS DA DELEGACIÓN DE ALUMNADO DA FACULTADE DE FILOLOXÍA E TRADUCIÓN

Artigo 3.-

1. Teñen dereito a formar parte da Delegación de Alumnado:
 - a) Representantes do alumnado do Claustro Universitario.
 - b) Representantes do alumnado membro da Xunta de Facultade.
 - c) Representantes do alumnado nos Consellos de Departamento adscritos á Facultade.

2. Serán membros da Delegación de Alumnado aquelas persoas que cumpran algunha das características anteriores e lle manifesten a súa vontade de formar parte dela á Secretaría.

3. Perderase a condición de membro:

- a) Cando se deixen de cumprir as condicións mencionadas no apartado 1 do presente artigo.
- b) Por renuncia expresa da persoa interesada.

Artigo 4.-

Son dereitos dos membros:

1. Expresar con liberdade as manifestacións efectuadas no exercicio da súa función, sen que ese dereito lles poida ocasionar prexuízo ningún.
2. Asistir con voz e voto á Asemblea e demais reunións propostas pola Delegación.
3. Elixir e ser electos para os órganos e cargos da Delegación.
4. Acceder a calquera documentación da Delegación.
5. Posuír unha compatibilidade entre o seu deber académico e as actividades da Delegación.
6. Acceder ás instalacións da Delegación de Alumnado.
7. Calquera outro que sexa conferido pola Delegación de Alumnado.

Artigo 5.-

Son deberes dos membros da Delegación:

1. Participar activamente en todas as actividades e tarefas da Delegación de acordo coas funcións a cada un encomendadas.
2. Asistir e participar nas asembleas da Delegación e aqueles actos derivados desta que lle correspondan segundo a súa función.
3. Acatar e respectar os acordos e decisións que adopte a Delegación.
4. Informar puntualmente os colectivos representados de todos os asuntos que incumban ou sexan do seu interese.
5. Participar nas distintas comisións de traballo que se creen.
6. Manter un estreito contacto cos outros membros co fin de non abstraerse da realidade e dos problemas cotiáns que afecten a todo o estudantado.
7. Atender o alumnado mediante os medios estipulados a tal efecto.
8. Respectar o espazo da Delegación de Alumnado e todo o material do que está dispón.

TÍTULO TERCEIRO: DOS ÓRGANOS DA DELEGACIÓN

Artigo 6.-

Son órganos colexiados da Delegación de Alumnos

- a) Asemblea
- b) Consello directivo

c) Comisións específicas nomeadas pola Asemblea

2. Son órganos unipersoais:

a) Presidencia

b) Vicepresidencia

c) Secretaría

Todos os órganos da Delegación serán elixidos por un período dun ano como resultado dun sufraxio interno, que será convocado nunha asemblea extraordinaria e polo tanto deberá reunir as características desta.

3. Son órganos formados por dúas persoas:

a) Tesouraría

Esta será elixida por un período dun ano como resultado dun sufraxio interno, que será convocado nunha asemblea extraordinaria e polo tanto deberá reunir as características desta.

SECCIÓN PRIMEIRA: DA ASEMBLEA

Artigo 7.- NATUREZA

A Asemblea é o máximo órgano de decisión da Delegación de Alumnado de Filoloxía e Tradución.

Artigo 8.- FUNCIONES

1.- Son funcións da Asemblea de Alumnado:

a) Determinar as liñas xerais da actuación da Delegación de Alumnado e aprobar o programa de traballo anual proposto polo Consello directivo.

b) Aprobar as propostas de modificación do Regulamento.

c) Decidir sobre as mocións de censura que se presenten.

d) A Asemblea pode designar figuras específicas para tarefas como: informática, comunicación, loxística e outras que se crean oportunas, que non pertencerán ao Consello directivo.

Artigo 9.- CONVOCATORIAS

1. As convocatorias da Asemblea poderán ser ordinarias ou extraordinarias.

2. A Asemblea reunirse con carácter ordinario, como mínimo unha vez cada cuadrimestre lectivo.

3. A Asemblea reunirse con carácter extraordinario, por aprobación do Consello Directivo, ou por petición dun 20% dos membros da Asemblea.

Artigo 10.-

1.- Toda convocatoria de sesión da Asemblea seguirá as seguintes especificacións:

a) Establécese o quórum para abrir a sesión da Xunta ordinaria na primeira convocatoria nun terzo dos seus membros e nos que estean presentes na segunda convocatoria, se non houberse

quórum en primeira.

b) A Asemblea considerarase convocada en sesión ordinaria mediante aviso por correo electrónico aos membros da Delegación de Alumnado da data, hora e lugar de celebración desta, ao menos tres días lectivos antes da mesma. Dita convocatoria deberá incluír, polo menos, a Orde do Día, preacta da Asemblea anterior e toda a documentación necesaria para os puntos mencionados na Orde do Día.

c) Establécese o quórum da convocatoria extraordinaria ao igual que na ordinaria (Artigo 10.a).

d) A convocatoria de Xunta extraordinaria deberase convocar mediante correo electrónico cun día polo menos de antelación na época lectiva e con tres días na época non lectiva.

e) A Orde do Día será fixada pola Secretaría xunto coa Presidencia.

f) As peticións dun 20% dos membros, con dereito a voto, da Asemblea será engadida na Orde do día como puntos propostos por estes, sempre con dous días de antelación para que sexan incluídos na Orde do día correspondente. As persoas solicitantes serán as encargadas de proporcionarlles, aos membros do Consello, a documentación necesaria.

Artigo 11.-

1. As sesións e toma de acordos deberán axustarse ás seguintes normas:

a) As votacións realizaranse a man alzada, salvo que algún membro da Delegación solicite o voto secreto.

b) Os acordos adoptaranse polo voto favorable de *máis da metade máis un* dos validamente emitidos. No caso de producirse un empate nunha votación, repetirase a votación tras unha nova quenda de debate. De repetirse o empate será preciso repetir o debate e votación nunha nova convocatoria.

c) Os primeiros puntos da Orde do día serán sempre os correspondentes a aqueles temas que haxa que someter a decisión ou consulta da Asemblea, aos cales só se poderá antepoñer a aprobación de actas das sesións anteriores e a exposición dos informes relacionados con algunha das decisións que se han tomar.

d) O voto será un por cada membro da Asemblea, pero considérase válida a delegación de voto, sempre que esta fose notificada previamente á Secretaría.

SECCIÓN SEGUNDA: DAS COMISIÓNS ESPECÍFICAS DA ASEMBLEA

Artigo 12.-

A Asemblea creará e disolverá as comisións de traballo que considere oportunas. As súas actividades poderán ser de iniciativa propia ou en colaboración con organismos, pero sempre referendadas pola Asemblea.

Artigo 13.-

As comisións estarán formadas mantendo a representatividade da Asemblea, sendo o Presidente/a e o Secretario/a de Delegación membros das mesmas.

Artigo 14.-

As comisións realizarán calquera informe que lles sexa solicitado polo Consello Directivo sobre o tema que motivase a súa constitución.

SECCIÓN TERCEIRA: DO CONSELLO DIRECTIVO

Artigo 15.-

1- O Consello Directivo estará formado pola Presidencia, a Vicepresidencia, a Secretaria e a Tesouraría.

2- Son funcións do Consello Directivo:

- a) Coordinar o funcionamento da delegación.
- b) A elaboración anual do plan de gasto anual.
- c) Cumprir e facer cumprir os acordos da Asemblea.
- d) Todos aqueles que lle encomende a Asemblea.

3- Funcionamento: as reunións do Consello Directivo serán convocadas pola Presidencia ou a *metade máis un* dos seus membros. A Orde do día será fixada pola Presidencia ou convocadores. Reunirse como mínimo con carácter ordinario cada mes con excepción de épocas de exames e períodos non lectivos.

4- Son deberes dos membros do Consello Directivo:

- a) Render contas en cada Asemblea e informar.
- b) Realizar as funcións encomendadas no presente Estatuto, pola Delegación e pola Presidencia.

Artigo 16.- DA PRESIDENCIA

Son funcións da Presidencia da Delegación:

- a) Asegurar o cumprimento dos Estatutos da Delegación.
- b) Representar a Delegación cando tal función non a exerza de maneira coordinada o Consello Directivo.
- c) Actuar de voceiro da Delegación de Alumnado.

Artigo 17.- DA VICEPRESIDENCIA

Son funcións do Vicepresidencia da Delegación:

- a) Exercer os labores da Presidencia no caso de que esta non poida levalas a cabo ou así llo encomende.
- b) Apoiar as funcións da Presidencia e mais a Secretaría da Delegación.

Artigo 18.- DA SECRETARÍA

- 1.- Son funcións da Secretaría redactar actas de cada sesión que conterá, como mínimo, as circunstancias do tempo e lugar en que se celebrou, o número de asistentes, os puntos principais de deliberación, a forma e resultado da votación e o contido dos acordos, así como asinar co visto e prace da Presidencia. A acta será aprobada na seguinte sesión.
- 2.- Calquera membro do Asemblea poderá actuar como persoa secretaria técnica en ausencia de este, a proposta da Presidencia.
- 3.- Levar a correspondencia.
- 4.- Dar fe dos acordos.
- 5.- Custodiar o arquivo e documentación.

Artigo 19.- DA TESOURARÍA

Estará formada por dous membros co obxectivo de velar pola transparencia dos fondos públicos.

As súas funcións son:

- 1.- Levar as contas da Delegación.
- 2.- A realización de cantas actividades sexan necesarias para lograr unha eficiente administración dos recursos asignados.
- 3.- Presentar ante o órgano competente da Facultade de Filoloxía e Tradución a xestión do ano da Delegación.
- 4.- Supervisar as infraestruturas e os gastos internos da Delegación de Alumnado.

SECCIÓN CUARTA: DAS COMISIÓNS DE TRABALLO

Artigo 20.-

- 1.- A Asemblea creará e disolverá as Comisións de Traballo, e regularaaas, polo que aprobará os regulamentos necesarios para o seu bo funcionamento, mais sempre que estas non entren en contradición cos presentes estatutos.
- 2.- As Comisións de Traballo estarán formadas por calquera membro da Delegación.
- 3.- As súas actividades poderán ser de iniciativa propia ou en colaboración con organismos da Universidade de Vigo.

TÍTULO CUARTO: DA MOCIÓN DE CENSURA

Artigo 21.-

- 1.- A Asemblea pode esixir a responsabilidade a calquera membro do Consello Directivo ou da Asemblea mediante moción de censura presentada ante o Consello Directivo da Delegación. A moción de censura non poderá propoñerse ata transcorridos catro meses dende o nomeamento daquel órgano.

- 2.- O Consello Directivo convocará nun prazo máximo de 15 días lectivos unha Asemblea Extraordinaria, na cal o punto da Orde do Día será debater a moción de censura presentada.
- 3.- A moción de censura presentada deberá facerse apoiada, polo menos, por un cincuenta por cento (50 %) dos membros da Asemblea.
- 4.- A votación da moción de censura proposta non poderá ter lugar antes dos dez días lectivos, nin máis tarde dos quince días lectivos seguintes á data da súa presentación.

Artigo 22.-

- 1.- Aberta a sesión, a primeira persoa asinante do escrito de moción disporá dun prazo máximo de 15 minutos para expoñer razóns que a fundamenten.
- 2.- Transcorrido ese tempo, o membro a quen se lle presentase a moción disporá dun prazo de idéntica duración para debater os fundamentos da moción de censura.
- 3.- A continuación abrirase unha quenda de intervencións cun prazo máximo dunha hora, distribuído polo Consello Directivo, de acordo cos criterios establecidos neste Estatuto.
- 4.- En todo caso, ao finalizar o período sinalado no apartado anterior, a Presidencia disporá dunha quenda de réplica cun tempo máximo de media hora.
- 5.- Concluído o debate, procederase a efectuar a votación da moción de censura, de maneira secreta e individual.

Artigo 23.-

- 1.- A moción de censura requirirá para a súa aprobación o voto afirmativo da maioría absoluta dos membros da Asemblea.
- 2.- A aprobación da moción de censura supón a expulsión do censurado do cargo e a convocatoria de novas eleccións para elixir a persoa que ocupará o cargo.
- 3.- A Presidencia da Asemblea comunicará esta decisión no prazo de tres días lectivos, seguintes da aprobación da moción ao órgano competente. No caso de ser a propia Presidencia a sometida á moción de censura, será a Secretaría a encargada de notificar o resultado da votación.
- 4.- O rexeitamento da moción de censura impide que poida presentarse outra contra as mesmas persoas ata o seguinte curso académico e, en todo caso, nunca antes de catro meses.

TÍTULO QUINTO: DA REFORMA DOS ESTATUTOS

Artigo 24.-

- 1.- A iniciativa de propoñer a reforma dos estatutos de Delegación de Alumnado corresponde á Asemblea.
- 2.- As propostas de reforma, dirixidas á Presidencia, deberán acompañarse do seu texto articulado e da argumentación na que se fundamenten.
- 3.- Recibida a proposta da reforma, o Consello Directivo remitiraa aos membros e acordarase un

prazo non inferior a dez días lectivos, nin superior a trinta, para que estes propoñan as emendas que estimen pertinentes. As emendas, debidamente clasificadas polo Consello Directivo, remitiranse de novo aos membros xunto coa convocatoria da Asemblea.

4.- Desde a data de presentación da proposta de reforma ata a da convocatoria da Asemblea, non poderá transcorrer un prazo superior a sesenta días lectivos.

5.- A aprobación da Asemblea das propostas da reforma dos estatutos require, en primeira votación, o voto favorable da maioría absoluta dos membros da Asemblea ou dous terzos dos presentes, na segunda.

6.- Cando a proposta de modificación teña por obxecto adecuar os estatutos ás disposicións legais promulgadas con posterioridade a entrada en vixencia daquel, será suficiente para a súa aprobación o voto favorable da maioría das persoas presentes.

7.- Rexeitada unha proposta de modificación que non sexa das previstas no apartado anterior non poderá reiterarse ata transcorridos seis meses.

8.- Con excepción das propostas contempladas no apartado seis deste artigo, non poderá presentarse ningunha outra modificación dos estatutos ata transcorrido seis meses dende a súa entrada en vigor.

DISPOSICIÓNS ADICIONAIS PRIMEIRA

Os aspectos non previstos no presente estatuto, serán regulados pola Asemblea de Delegación.

DISPOSICIÓNS FINAIS

Este Estatuto entrará en vigor ao día seguinte da súa aprobación pola Asemblea e condicionada a súa ratificación pola Xunta de Facultade de Filoloxía e Tradución.